

# Papru

## TISARÚNIKIANMAYA SHUARAN

### ATAKSHA papin aar akuptukma

---

Papru ni tsaniakmarijjaj Yus-shuaran áatramiania nu

**1** <sup>1</sup>Wikia Pápruitjaj. Wisha Serpanujaj tura Timiutéujaj iruntran atumin Tisarúnikianmaya Yus-shuar árumna nuna ju papin áatjarme. Atumsha ii Aparí Yusna tura Uunt Jesukrístunu ajasuitrume. <sup>2</sup>Tuma asakrumin ii Aparí Yus tura ii Uuntri Jesukrístusha waitnentrama ásarmatai yáinmakar péñker awajtamsarat tusan wakerajrume.

Kristu támatai tunáa shuáran Yus asutiáttawai

<sup>3</sup>Yatsurú, átum péñker matsatu asakrumin iisha Yus tuke yúminñkijaj. Átumka Yus nekas enentáimtustin nú núkap nekaakrum wéarme. Tura nuamtak aneniastincha nú núkap nékarme. Nu tuma asamtai Yus yuminsatniuitji. <sup>4</sup>Átum Yus-shuar asakrumin chíkich shuar atumin yajauch awajtamainiawai. Tura itiurchat wainiu asarum ti wáitiarme. Nu tuma ajñ átumka katsuntearme, tuke Yus enentáimta asarum. Nu tuma asakrumin, iisha Yus-shuar matsatainia nuka warasar ujainijaj. <sup>5</sup>“Yusa akupeamurin pachiinkiamniaitrume” Yus túramprume. Nuñ pachiinkiataj tau asarum ju nunkanam wáitiarme. Tura wáitiakrumsha nuna nankaamas iwiarnaruitrume nuñ pachiinkiatin. Kame nújajñkia Yus atumin achirmak péñker túrait, nuka páantaiti. <sup>6</sup>Núnisanñ atumin wáitkiarmainia nunasha Yus tímiatrusañ wáitkiasartincha nekas péñkeraiti. <sup>7</sup>Tura wáitiarmena nusha Yus fíjjajisha ayamtikramprartin

pénkeraiti. Ii Uuntri Jesukrístu ji keana ímianisan kakaram suntarijiaí nayaimpinmaya tara wantinkiamtai, nu tsawantaj Yus ayampratniun suramsartatji. <sup>8</sup>Tura nú tsawantajsha Yúsán nékainiatsna núnaka ii Uuntri Jesukrístu ti asutiátajtsa tátatui. <sup>9</sup>Taa, nincha menkkatniunam akupkartatui. Chichaak “Wi pujajna juyá akupeajrume” títiatui. Tura winia ti kakarmar atsana nu akupeajrume, átum winia umirtukcha asakrumin” nin tiartatui. <sup>10</sup>Kame Uunt Jesukrístu tátin tsawantri jeamtai, ni shuari, ni enentái pénker awajrsaru áinia nu, ni náarin shiir pachisartatui. Tura Yúsán umikiaru ásar, ti shiir enentáimsar Jesukrístun íisartatui. Ii ujakmajrumna nu antukrum umirka asarum atumsha nu pachiinkiatarme. <sup>11</sup>Nu tuma asamtai ii Yusrin atumin tuke áujtajrume. Yus atumin achirmakuitrume. Nuiñkia Yuska atumí enentáin takas Nii wakera nujai métek awajtamsati, taji. Yus umirka asarum pénker wekasataj tusarum wakerarme. Túrarum Yus enentáimtusrum pénker túratin wakerarme. Tura wakerarmena nu umiktin Yuska ni kakarmarijiaí yáinti, tu áujtaji. <sup>12</sup>Átum pénker wekasa asakrumin chíkich shuarsha ii Uuntri Jesukrístu náarin nankaamantu enentáimtusartatui. Nusha auka ii Yusrí tura ii Uuntri Jesukrístu waitnentáimturmasar pénker wekasatniun yáinmakui túrarme. Túramtai chíkich shuar shiir enentáimturmasartatui.

### Tuke Tunaarintin wantinkiattana nu

**2** <sup>1</sup>Tura, yatsuru, ii Uuntri Jesukrístu tátatna nuna tura Nijjiaí inkiunaiktatjinia nunasha ujaktinian wakerajrume. <sup>2</sup>Chíkich shuar anankramawar “Uunt Jesukrístu tsawantri jeayi” tu ujatmaktaj tusar wakeruiniawai. “Iimiarmaj nujai nékajai” turamainiakuisha, “chícham étserman antukmaj nujai nékajai” turamainiakuisha, tura “Papru papí áarmari nuna takui nékajai” turamainiakuisha, páchim enentáimprairap. Tura sapijmiakairap tusan seajrume. <sup>3</sup>Penké anannawairap. Nekaatarum. Nu tsawant jeatsain Yúsnumia kanaktin átatui. Tura nú arant, Tuke Tunaarintin, emesnartatna nu wantinkiattawai. <sup>4</sup>Niisha aya wíniak enentáimtursarat tusa wakerak, ántar-yusnasha tura nekas Yúsasha shuar tikishmatrarain tusa ti nakitrattawai. Niñki ti nankaamantu enentáimtumas, Yusa nuke ajas, Uunt Yusa Jeeen wayáa pujustatui. “Júiti Yus” shuar turutiarat tusa mash túrittaiawai. <sup>5</sup>Yatsurtiram, wi atumjai pujakun nuna ashí ujakmajrume. ¿Nuka kajinmakniurmek? <sup>6</sup>Yámaikikia, ni tsawantri jeatsain, Tuke Tunaarintin wantinkiaíin tusa surimia nu nékarme. <sup>7</sup>Tunaasha yamaisha awai, tura paantcha. Túrasha tunaan surimia nu juramkitniuk taasai nu tunaaka paant átin. <sup>8</sup>Nuiñkia nu Tuke Tunaarintin wantinkiattawai. Tura Uunt Jesus ni wengjai umpuí aun máattawai. Tara ni wincharijiaí nuna amuktatui. <sup>9</sup>Nu Tuke Tunaarintin, iwianchi uuntri Satanás akupkam tátatui. Ni kakarmari iniakmastaj tusa,

arentsti túrachminian túrak anaṅkawartatui. <sup>10</sup>Jinium wémin ainia nú shuaran ashí tunáa ana nujají anaṅkawartatui. Nu shuar Yus-Chichaman nekas ana núnaka nakitraru ásar uwemprachmin áiniawai. <sup>11</sup>Iis, nekas ana nuna nakitia ásarmatai, ti anaṅmamawar wait-chichaman umirkarat tusa Yuska tsanṅkattawai. <sup>12</sup>Warí, niisha ni tunaarín wararainiak, nekas ana nuna nakitraru ásarmatai, Yuska “jinium wétatrume” tiartatui nuna.

### Uwempramin ainia nu

<sup>13</sup>Tura, yatsuru, Uunt Jesus aneamu árumna nu, iisha atumin enentámtusar ii Yusrî yuminsaji. Átum nekas ana nuka umikiurme. Tuma asakrumin Yusa Wakaní atumí enentáin pēṅker awajtamsaitrume. Nu tuma asamtai yámankamtaikniumiá Yuska “átum uwempramniaitrume” túramprume. <sup>14</sup>Nu túrunat tusa Yus wakerutmarme. Krístujají Uwempratin Chicham ii ujakjinia nujají Yus untsurmakmarme. II Uuntri Jesukrístu ti pēṅker pujana nuí pachiinkiamniuram tusan ujakmajrume, nú chichaman.

<sup>15</sup>Wátsek, yatsuru, Yusjají katsuártarum. Yus-Chicham etserkamu antukurmena nu, tura wisha áaran akuptukjarmena nusha kajinmatkiirap. <sup>16</sup>Ii Uuntri Jesukrístusha tura ii Aparí Yussha ti pēṅker ásar incha anenmatsjik. Tura waitnentrama ásar incha shiir enentámtikramji. Tura nú naṅkaamas ii tuke pēṅker pujustinian ikiurtamsaitji. <sup>17</sup>Nu tuma asamtai, pēṅker chichastarum tusa, tura pēṅker takastarum tusa Jesukrístuka shiir enentámtikramar ikiakátmarartí.

### Papru “áujtursatarum” tímiania nu

**3** <sup>1</sup>Nuyá, yatsurú, Yusa chichame shiir pampartí tusarum Yus áujtursatarum. Átum Yus-Chicham wakerukmarmena áintsan ashí nunṅkanam wakerukartí tusarum Yus seatarum. <sup>2</sup>Tura yajauch shuar, pēṅker ana nuna ti nakitiaiania nu, incha yajauch awajtamsachartí tusarum Yus áujkartustarum. Kame chíkich aents Yúsan umirkacharu áiniawai. <sup>3</sup>Túrasha Uunt Jesusak atumin iniaitsuk wáitmaktatrume. Tura atumin ikiakátmartatrume. Tura íwianch anaṅkramataj takui kíishturmaktatrume. <sup>4</sup>Kame Yus atumin yainmaktatrume, taji. Ii tájinia nu yamáí umíarme. Tura tuke umirkattarme. Nusha nekaar shiir enentáimji. <sup>5</sup>Uunt Yus yainmakartí ni aneṅkrattairín nekaatniun. Kristu itiurchatan katsuntramia núnisan atumniasha katsuntratniun Yus yainmaktí.

### Takastiniaitji

<sup>6</sup>Yatsurtiram, antuktarum. Ii Uuntri Jesukrístu chichamejají ju taji: “Nuyá Yus-shuar wi jintintramun nakitiaak aya wékana nu ikiuktiarum.”

7-8Ii túrajnia núnisrumek túratin nékarme. Júiiti: atumjai pujusmaj nui tuke takakmasmijai. Atumí yurumkarí iisha akikmakar yurummijai. Atumjai itiurchat áchatí tusar tsawajsha káshisha tuke takakmasmijai. 9Kame iisha, Kristu akatramu asar “yáintkiatarum” tíminiuji; túrasha nu tútsuk, ii túrajnia núnisrumek túratin nekaatarum tusar, iisha tuke tsawant takaamijai. 10Warí, atumjai pujumij nui “Takastinian nakitiana nuka yurumáshti” tíchamkají. 11Iis, atumiinia weeá, nánkamas enentáimiainiak tura nánkamas túruiniak penké takatsuk pujuiniawai, túramainijai. 12Nú shuáran ii Uuntri Jesukrístu chichamejai “Táakamtak shiir takakmasartí” tajai.

13Yatsurtiram, yawetsuk shiir túratarum. 14Ju papinium ii tájnia nuna, shuar umiktinian nakitiakuinkia “umichuiti” tákuram, ni natsarat tusarum ikiuktiarum. 15Túrasha “Yus-shuara nemasrinti” tiip. Áyatik jintintrata, tura Yúsai enentáimtikrata, ame nekas yatsumeá áitkiasmek.

#### Papru aujsua ikiuamu

16Uunt Yuska, imiatkichu enentái susamniaiti. Júi Yus, itiurchatnum pujarminin atumin tuke imiatkichu enentáimtikramsarti. Uunt Yuska atumin pujurtamsarti, tajai.

17Jui wi Papru juna aajai. Wi papin akupeaj nui júnisnak winia náarun áaran apujeajai, wíniaiti tusan. 18Ii Uuntri Jesukrístu atumin ashí yainmakarat tusan wakerajrume. Nu atí.